



SIE Susch / Nudigls etappa 2021 - refacziun via da god - dumonda da princip

La prüm'etappa da la refacziun da la via da god Susch, Nudigls ha pudü gnir realisada l'1 on 2020. La seguonda part cuntegna lavurs da finischun, refacziuns vi da la vetta portanta e vi da la vetta d'asfalt. Il credit es gnü approvà illa radunanza cumünala dals 26 november 2020. La suprastanza ha approvà l'inizi dal proget.

SIE Lavin / Suorns - refacziun via da god - dumonda da princip

La via da god Lavin, Suorns es in ün nosch stadi ed id es necessari da far üna refacziun punctuala, impustüt da spalüdamentals, schalgiamants punctuals ed ingrondimants da plazzals. Cun quista refacziun es garantida eir per l'avegnir üna cultivaziun dal god Chapisun e dals gods Gonda e Suorns. Il credit es gnü approvà illa radunanza cumünala dals 26 november 2020. La suprastanza ha approvà l'inizi dal proget.

Zonas da quietezza temporaras

Il guardgiasulvaschina ha dumandà al cumün da pudair s-chaffir zonas da quietezza temporaras per la sulvaschina. I's tratta dals territoris Vallun Gondas – Laschadura, Umblin – God da Munt e Munt da Brail – Munt Barlas-ch. La problematica es la blera naiv e las personas chi disturban la sulvaschina cun lur activitats da sport e da temp liber. Id es gnü decis da surdar al guardgiasulvaschina insembel cul manader da las Gestions Tecnicas la cumpetenzza da decider a cuorta vista sur da la necessità da metter sü las tablas in quistas zonas.

Dumonda da credit - progettaziun planisaziun sarinera Zernez

Per proseguir culla lavur da progettaziun da detagl e las submissiuns haja dat malincretas culla cifra chi'd es gnüda tutta sül preventiv 2021. La cifra gnüda tutta sül preventiv 2021 es la cifra per realisar il provisor. Displaschaivelmaing es gnüda manchanta la cifra per proseguir cun l'elavuraziun dal proget da detagl e submissiuns. Quellas lavurs ston gnir fattas d'urant l'on 2021 per pudair executar cullas lavurs a partir da prümavaira 2022. La suprastanza ha approvà la dumonda da credit da 140'000 chf, resalv l'approvaziun dal credit supplementar tras la votaziun a l'urna dals 25 avrigl 2021.

Dumonda da credit – provedimaint d'aua QS/TWN

Culla planisaziun dal preventiv 2021 haja dat malincretas regard il credit per cumanzar culla evaluaziun e planisaziun dal QS (Qualitätssicherung) e TWN (Trinkwasserversorgung in Notlagen) da l'aua da baiver sül territori dal Cumün da Zernez. Quista lavur es necessaria per gnir davo ils obligs dats avant da l'uffizi chantunal. La suprastanza ha approvà la dumonda da credit da 50'000 chf per quist nouv proget, resalv l'approvaziun dal credit supplementar tras la votaziun a l'urna dals 25 avrigl 2021.

Forz'electric a Brail - adattamaint da la legislaziun cumünala in seguit a la surtutta da la rait electrica a Brail

Cun la surtutta da la rait electrica a Brail süls 1-1-2021 esa d'adattar eir la legislaziun cumünala correspondentamaing. La suprastanza cumünala ha acceptà ils adattamaints chi han da gnir approvats tras la votaziun a l'urna dals 25 avrigl 2021.

Rimplazzamaint Seraina Bickel i'l cussagl da fundaziun CSEB

La suprastanza cumünala ha decis da delegar a Stefan Bühler sco suprastant dal Cumün da Zernez i'l cussagl da fundaziun dal Center da sandà Engiadina Bassa. Quist rimplazzamaint es gnü fat causa cha Seraina Bickel es gnüda eletta illa suprastanza dal CSEB.

Persunal

Principi da l'on da scoula 2021/2022 cumainza Julia Embacher sco nouva mainascoula e commembra da la direcziun operativa sia piazza pro'l Cumün da Zernez. Julia Embacher rimplazza l'ingeschamaint dal collavuratur Yannic Gross chi banduna la scoula da Zernez sülla fin da l'on scolastic 2020/2021.

Società cooperativa butia Lavin - dumonda da prolungar la süertà existenta per ulteriurs desch ons

La süertà dal Cumün da Zernez chi exista daspö l'on 2003 e chi'd es gnüda prolungada l'ultima vouta dal 2011 per desch ons scrouda süls 28 favrer 2021. Per garantir inavant üna gestiun economica e flexibla da la Butia Lavin prolunghescha la suprastanza cumünala quista süertà per ulteriurs desch ons, fin la fin da favrer 2031.

Radunanza cumünala

Causa la situaziun actuala regard il coronavirus ha la suprastanza decis da far adöver da l'ordinaziun extraordinaria e da rimplazzar la radunanza cumünala cun üna votaziun a l'urna. La glista da tractandas provisorica per quista votaziun a l'urna es gnüda approvada.

Büro electoral per las votaziuns dals 7 marz 2021

La suprastanza cumünala ha elet il büro electoral per las votaziuns dals 7 marz 2021. Al büro electoral fan part: Emil Müller sco president, Riet Denoth, Stefan Bühler, Simon Rohner e Corsin Scandella sco actuar.

Statistica sezzüdas, radunanzas e votaziuns 2020

La suprastanza cumünala es gnüda orientada sur da la quantità da sezzüdas e tractandas da l'on 2020. La direcziun operativa ha trattà 474 tractandas in 26 sezzüdas, percenter ha la suprastanza cumünala trattà 247 affars in 17 sezzüdas. In trais radunanzas cumünalas han votantas e votants decis sur da 21 tractandas. D'urant l'on 2020 haja dat duos votaziuns a l'urna.